

Pineqartoq: Siunnersuut: Inatsisartut Naalakkersuisullu pillugit Inatsisartut inatsisaat**Saqqummiussissut**

(Naalakkersuisut siulittaasuat)

Siullermeerneqarnera

Naalakkersuisut sinnerlugit matumuuna Inatsisartut Naalakkersuisullu pillugit Inatsisartut inatsisissaattut siunnersuummik saqqummiussaqaasaanga.

2009-mi namminersorneq pillugu aqqissuussineq namminersornerlu pillugu inatsit atortuulersinneqarpoq. Namminersorneq pillugu inatsisip Kalaallit Nunaat nunanut tamat oqartussaaqataanerat naapertorlugu nutaatut ingerlanneqartut aalajangersarneqarpoq. Taamaattorli namminersorlutik oqartussani oqartussaaffinnut, Inatsisartunut Naalakkersuisunullu malittarisassat sukumiinerusut naleqqussarneqarsimanngillat. Taamaattumik Inatsisartunut Naalakkersuisunullu Inatsisartut inatsisaat nutarterneqarnissaa pisariaqarpoq.

Inatsisartut Naalakkersuisullu pillugit Inatsisartut inatsisissaattut siunnersuummi matumani namminersorneq pillugu inatsit timitalerneqassaaq, taamaalillutillu Inatsisartut Naalakkersuisullu peqatigiillutik ukiuni aggersuni patajaatsumik inuiaqatigiit ineriartortinneqarneranni aningaasaqarnermikullu imminnut napatittut unammilligassat eqqarsaatigalugit ullutsinnullu naleqquttumik ingerlanissaannut sinaakkusersuinissaat periarfissinneqassamat.

Inatsisartut inatsisissaattut siunnersuummi Inatsisartut Naalakkersuisullu akornanni suliat agguataarneri pioreersut politikikkullu naligiinnerit pingaarnertigut attatiinneqassapput. Taamaattorli malunnartumik pisariaqartitat ataasiakkaatigut allannguuteqarput.

Taamaalilluni Naalakkersuisut siulittaasuat siunnersuut aqqutigalugu ullutsinnut naleqqiullugu Naalakkersuisut sinnerinut tunngatillugu pisinnaatitaaffeqalerpoq. Siulittaasoq taamaalilluni Naalakkersuisunut ilaasortat sulinngiffeqarallarnissaannut soraarsinnissaannullu akuersissuteqarsinnaalerpoq, tamannali Inatsisartunit atorunnaarsinneqarsinnaalluni.

Inatsisartut siunnersuut naapertorlugu suleriaatsiminnik ilusilersuinissaminnut periarfissaqarnerulissapput, piffissat ataatsimiinnissatik piareersarsinnaalerlugit namminneerlutillu ilaasortamik qinigaanerisa atorsinnaassusiannik qinigaasinnaassusiagaasinnaanerannullu aalajangiisinnaalerlutik. Inatsisartut inniminarluinnartuunerannik aalajangersakkanik atuutsilersitsisoqassaaq aamma ilaasortat namminneq nalunneqatiginnissusertik kisiat tunngavigalugu kiffaanngissuseqarnerat aammalu inatsisartunut ilaasortaattillutik unnerluutigineqarsinnaannginnerat ataatsimiinnerit avataanni atorneqarsinnaanngorlugit atuutsinneqalissapput.

Ombudsmandi oqartussaaffittut namminersortutut erseqqissarneqassaaq, Inatsisartut inatsisaannik Namminersorlutillu Oqartussat nalunaarutaannik nalunaaruteqartarnermi periaaseq nutarterneqassaaq tatiginninnginnermillu saqqummiussinnermut atatillugu aalajangersakkat manna tikillugu nalorngissutaasartut erseqqissarneqassapput.

Kiisalu siunnersuutigineqarpoq Inatsisartunut ilaasortat kalaallit oqaasiinik atuisinnaanngitsut Inatsisartuni danskisut oqalussinnaanissaat periarfissaqartinneqassasoq kalaallisut oqaatsitsinnut nutserineq aqputigalugu. Taamatuttaaq isumaqatigiinniarnert kalaallisut danskisullu tamanut saqqummiunneqartassapput. Taamaaliornikkut qulakkeerneqassaaq Inatsisartunut ilaasortat innuttaasullu ilaat kalaallit oqaasiinik atuisinnaanngitsut tamat oqartussaaqataaneranni pisunut peqataanissamut periarfissinneqassapput. Tamatumani piumasarineqassaaq paasissutissat tamanut saqqummiunneqartut tamatigut kalaallisut danskisullu pigineqartarnissaat.

Naalakkersuisut Inatsisartut Naalakkersuisullu pillugit Inatsisartut inatsisissaattut siunnersuut aqputigalugu kissaatigaat Inatsisartut Naalakkersuisullu akornanni pissutsit pillugit ullutsinnut naleqquttumik inatsisiliortoqarnissaa qulakkeerneqassasoq, tamannalu aqputigalugu nunatsinni inatsisartoqarnikkut periaatsimik naapertuuttumik tunngaviliilluni.

Siunnersuut Inatsisartunut suleriaaseq pillugu siunnersuummut aamma inatsisartunut naalakkersuisunullu il.il. ilaasortanut akissarsiaqartitsineq pillugu inatsisartut inatsisaata allanngortinneqarnera pillugu Inatsisartut inatsisissaattut siunnersuutitut isigineqassaaq.

Taamaalillunga siunnersuut Inatsisartuni oqaluserisassanngortippara